



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

f Tir Yimym

ig tiryimym@aolima

yt tir yimym

TAPAK 8

Montenegro tir election nung
Milatovic-i takok nguogo

Graham Potter mapa
nungi anentsüogo



VOL. XX NO. 172 (ADOK 172) DIMAPUR SANGTENNÜ (TUESDAY)

RONGCHII (APRIL) 04, 2023

₹ 5.00

NMA tasenbaji Naga nunger dak apet yanglutsüla

Mokokchung, 03 April (TYO): 14 buba Nagaland Legislative Assembly mezüing senden amandang Nagaland sorkari 'Nagaland Municipal Act, 2001' meshimeshia agientsü telemtetba agiba asoshi pelar, ta Nagaland nung aliba Town Council-tem den DUCCF, AWUMT aser AKMWP ajanga metetdaksüogo. "Indian Constitution kübok Arla 371 (A) nung asen temeten kümzüka ayutsü atema NMA 2001 nung temelenshitsu kar agitsü Nagaland sorkar dang mapang balala nung khuret lemsatepa aruogo. Aji oda, sorkari 14 buba NLA mezüingbuba senden nung NMA, 2001 intoktsü lemtetbaji takok tulu lir aser ibaji ochi pukümer senso nübur ajaki pelatsüla" ta parnoki sangdong ka nung metetdaksü.

"Kodang NMA ji yangludir, Naga nunger lokti, sobaliba aser benshia aruba yimsüymbong, itemji bilema/shisadanga inyakdaksünür, kechiyong state ji Indian temzüng kübok 74th Amendment Act-i tashi agütsür

aor, kong state-i pei state dak apet pei sasa tzüüngozüngtem yangluteter", ta Municipalities 3 den Nagaland nung aliba Town Councils-i yokba sangdong nungjisa shisema liasü.

"Tangar state municipal/corporation indang majizüki pei temeten kümzüka ayutsü asoshi aser asenok dak apet Act ji yangludaksünür, kechiyong Nagaland state ya tanga state ama masü, Nagaland nungbo aliji nübur meyong lir, anungji, Indian temzüng kübok Arla 371 (A) atsünga marutsüsa aser asen temeten kümzüka ayutsü asoshi luyim balala nungi mongintem anioka asenok meyong Act ji yangludaksünür", ta parnokisa mepishia metetdaksü.

Nagaland Municipal Act tasenba kübok pei ward-tem nung pei lenir shima atangji nung temelenshiba bener arutsü asoshi NMA ji yaktatiba nung renemdaksünür, ta DUCCF tir Zasivikho Zakiesato, AWUMT tir Limanungsang aser AKMWP tir Thajao Sekhose nungeri sorkar dang temepishiba ka metetdaksü.

Kohima nung G20 Business Meet atema maparen ajak renemogo

Dimapur, April 3, 2023 (TYO): Nagaland nung G20 Business Meet amongtsü atema state sorkari maparen ajak renemogo. B20 ya alima nung shishilembartem asoshi official G20 dialogue forum lir.

Nagaland Chief Minister Neiphu Rio-i Hombarnü Chumukedima nung osangbener den jembidang B20 conference ya April 4 nungi 6 tashi Kohima nung amongtsü aser iba sentong nung linük 29 nungi teshimtet nübo 64 adentsü ta ashi.

April 5 nü B20 conference nung Union Minister of State for External Affairs Dr Rajkumar Ranjan Singh adentsü, ta paisa ashi.

Maneni, Costa Rica, Cuba, Iceland, Jamaica, Paraguay, Panama nungi Ambassador tem, Estonia nungi Deputy Head of Missions aser Costa Rica o Germany nungi Council Generals iba sentong nung adentsü, ta CM Rio-isa ashi.

Maneni, Bhutan, Bangladesh, Iceland, Japan aser UAE nungi Trade and Business delegations-i Kohima nung B20 sentong nung adentsü, ta paisa shisem.

Confederation of Indian Industry (CII) den state sorkari Business to Business (B2B) aser Business to Government (B2G) meetings ayonga amentsü, ta Rio-isa metetdaksü.

Sorkar Department tem-Tourism, Commerce and Industries, Agriculture, Horticulture, Healthcare aser Food Processing amala den sensaksemsü atema 100 B2B aser B2G requests arua lir, ta pai ashi.

"Alima tesem balala nungi teshimtet nübotem arutsü aliba atema Nagaland sorkari Naga nunger sobaliba, achiajemsü, art, benjungbentsü aser alima tobur ajung sayutsü sentongtem renema lir" ta CM Rio-i osangbener dang ashi.

IDAN-i state sorkar indang Investment Promotion Agency (IPA) ka ama tanga sorkar department tem den investible projects aika renemogo, ta paisa ashi.

"Naga nunger lokti tentet aikati NMA2001 ajanga Arla 371(A) dak kongshitsu ta ashiba ajanga state sorkari iba Act agientsü lemtet. Telok balala aser sendaktepa

alirtem den jungjunga jembitepba sülen ang sorkari Act tajung ka yanglutsü saka iba atema anogo züingzüka mali" ta CM Rio-isa metetdaksü.

"Nagaland rongsenketzüng renloktsü atema lenmang aika lir saka tanga state tem dang nungi balaka land holding systems amala inyakyimtem aliba ajanga tetsükdaksü ajurur. Sorkari ali kiburtem tenemtsünglen special economic zone atema jembitepdar" ta paisa ashi.

"Nübertemi iba ya nüngdakba ya angatetra lanurtem atema maongka aika bentsür arutsü aser foreign investors atsür arutsü" ta CM Rio-isa ashi.

Kohima nung amongba G20 Business Meet nung Argentina, Australia, Bangladesh, Bhutan, Canada, China, Costa Rica, Cote D'Ivoire, Cuba, Estonia, Germany, Ghana, Iceland, Indonesia, Ireland, Italy, Jamaica, Japan, Nepal, Nigeria, Panama, Paraguay, Romania, Russia, South Africa, Sri Lanka, Turkiye, United Kingdom aser United States of America nungi teshimtet nübotem arua adentsü sentong lir.



NAGALAND WELCOMES ALL G20 DELEGATES FOR THE BUSINESS MEET (B20) AT KOHIMA

Nagaland
B20 BUSINESS MEET
5TH APRIL 2023
KOHIMA

DGP Nagaland-i DEF Kohima atema 'Traffic Patrol' gari semzüktsü



Dimapur, Rongchii/April 03 (TYO): Police Headquarters, Kohima nung April 3, 2023 nü sentong tongmelang ka agia Director General of Police Nagaland, Rupin Sharma, IPS ajanga DEF Kohima asoshi 'Traffic Patrol' LMV gari ana semzükja liasü.

Sentong tenzuka Superintendent of Police Kohima, Imnalensa IPS ajanga iba sentong indang nukjidong lemsatepba mapang, 'Traffic Patrol' ya taoba mapang aser tang teinyakdak unit officers Talisunep Imchen, NPS, Z. Tshurhosie Kajiri, NPS aser T. Henthai Phom, NPS nungertemi asateta liasü, ta ashi.

Aikati two wheelers ang amshiner saka state yimtiba nung meyi mapang arur asünung aser duty senzürtem anisüngzük bilemja Light-Medium Vehicle (LVM) ana ya ali, ta SP Kohima ajanga ashi.

Traffic Patrol ajanga traffic dak sendakba ajungben rongdak nüngdak, talisa lenmang nokdanga aliba, lendong ajuruba aser lenmang majungba indang osang agütsüba amala nung tekeraba nung traffic personnel tem anir jajatsü.

Parking aser traffic ozüngtem shidak amshitsü atema parnoki yimti sema jajatsü, aibelener aputsü.

SP ajanga Kohima nung anogoshi traffic personnel temi traffic anepaluba mapang timtem balala ajuruba lemsatep aser item rongnung parking atema tesem peria maliba aser gari tali akumba indang shia liasü.

Pai 'ring roads' alitsü nüngdakba lemsatep aser office nung senzürtem kar aika nung mesüi akok tashi tajemba nung senzütsü achayangtsü aser lokti senzütetba gari tem tali amshitsü asosh lenmang bushiteptsü ayongzuka liasü.

DGP Nagaland ajanga iba sentong nung jembidang SP aser par team ajanga sentong tajung asatetba aser department atema rongsen bener aruba asoshi tenüngsang agüja liasü.

Mapa takok ngua aser shidak inyaktsü asoshi gari tem nung GPS inoktsüla, ta pai totuyuba agüja liasü.

Paia traffic ketdangsüba mapang timtem ajuruba indang ashi aser aonungbo yimtung timba azüng-azünga alir, anungji anüngdang lenmang nung

anena ayuba gari tem aonungbo kidang anena yuteter ta sayur, ta ashi.

Pai unit officers dang sen talang agütsür gari anena ayuba nung amshitsü sorkar mesüra jurila meyong tesem tazüng jangjateptsü ajungshia liasü.

Pai Kohima Traffic Police dang gari anena ayuba aser traffic ozüng akang-akanga amshitsü metetdaksü aser traffic timi ketdang asüba ajanga yimtung nung sepai tashi sayur aser police force nung ajaki anguba branch ji traffic police ya lir, ta ashi.

DGP Nagaland ajanga gari kiburtem dang G20 Business Meet mapang lenmang mesümenangba aser traffic police temi temerenshi agütsüba nungi jenbua alitsü atema Old Medical Directorate aser Old NST nung aliba multi-level car parking lot tem amshitsü ayongzuka liasü.

Item Traffic Patrol gari ya Police Union Baptist Church Kohima indang pastor-i meshiteta sarasademtsü aser DGP Nagaland, Rupin Sharma, IPS ajanga semzükja liasü.

Iba gari ana ya North aser South traffic control den ayutsü.

Mejangjaba nisung tasü mang ka nguteta lir

Dimapur, Rongchii/April 03 (TYO): Tourist Lodge, Dimapur indang tanabuba gate anasa mejangjaba nisung tasü mang ka laoa lir, ta April 3, 2023 anepdang 8:20 ako meta East Police Station, Dimapur dangi osang ka aru,

Iba osang nguli East Police Station duty part temi tasü mang aliba tesem bushia ao aser Tourist Lodge, Dimapur anasa arishi küm 55-60 tsüngta mejangjaba nisung (non-local) tasü mang ka ngutet.

Parnoki bushisüngdangba mapang iba nisung asüba nung temolung melemettsüsa kecha

mongutet. Iba nisungba ya aya agi asü südi, ta temolung melemi lir.

Ozüng agi melaba maparen ajak inyakba sülen tasü mang ya jangjatettsü asoshi District Hospital Dimapur morgue nung bener oa lir.

Iba nisungba ya sentsü temesüng temtangpusa tola talang ka, aut sentsü half sweater, vest sentsü temesüng, underwear aser formal pant sentsü tanen semer liasü.

Kibur/kinunger/medemer temi Officer-in-Charge, East Police Station, Dimapur den Mobile No. 7085055020 ajanga tongteprateptsü akok.

Dimapur nung cabin crew shimba sentong agitsü

Dimapur, Rongchii/April 03 (TYO): IMC Hall anasa Emporium Skills Training Institute, Dimapur nung April 20, 2023 nü International Airline tulu ka ajanga cabin crew atema recruitment drive ayongzuka agitsü.

Nagaland nung international airline tulu ajanga campus recruitment drive agiba ibai

mezüngbuba alitsü. Iba dak sendakba nung Nagaland nung aliba district ajunga nung tetsür tejangrar temi WhatsApp Number -8730899943 nung pei tenüng, tar aser tazüngba tejangja zülur April 15, 2023 tashinung agütsüsüla.

Iba atema arishi küm 18-27, tar tajemba agia 155cm asütsüla aser class 12 pass bo asütsüla.



NPCC tir tasenba, S. Supongmeren Jamir aser par teloki AICC tir Mallikarjun Kharge ajurua state nung Congress inyaksangshi indang tatsü-talang ajak jembia liasü. AICC tiria state nung tensa balala ajurua aliba atema bilemetsüba lemsatep aser akokba lenmang nung yariteptsü ashi.

IGNOU indang 36 buba Convocation sentong agiogo

Dimapur, Rongchii/April 03 (TYO): Indira Gandhi National Open University (IGNOU) Regional Centre Kohima, Nagaland indang 36 buba Convocation sentong Ura Academy Hall, Kohima nung April 3, 2023 nü agia liasü.

Iba sentong nung tesemdanger tongti ama jembidang Vice Chancellor, Tripura University, Agartala, Prof. Ganga Prasad Prasain-i discipline balala nung Degrees/Diplomas aser Certificates anguba kaketshir nem tenüngsang agüja liasü.

IGNOU ajanga nisung meyerijang aika ajangzuka arur aser 36 buba Convocation nung degree agizüktsü aliba kaketshir tem IGNOU nung zünga degree agizüktsü maongka anguba ya kanga tia taka, ta Prof. Prasain-i ashi.

Kaketshir karbo IGNOU nung züngse tang IAS officer kumer lir, ta pai ashi aser kaketshir dang pei akokba nung tajungtiba agi meranga azüngtsü aser takok arishitsü ayongzuka liasü.

IGNOU nungi anguba Degrees/Diplomas mesüra

Certificates ya conventional mesüra traditional institutions/universities nungi anguba Degrees/Diplomas mesüra Certificate den kasa lir aser linük nunga aser bendang lima nunga recognised süa lir, ta Prof. Prasain-i metetdaksü.

Prof. Prasain-isa National Education Policy (NEP) indang rateta ashiba den külemi kaketshirtem online ajanga discipline balala nung temaba jenjang tonga züngtetsü aser nisung kati mapang kasa nung degree ana agitetsü aser maongka tali bushitetsü, ta ashi.

Linük nung nüburtem arishi küm, kin aser yamala telemsa makai education tali ngutettsü mechi linük nung IGNOU Study Centre 15 lir, ta pai ashi.

India nung danga state tem nung ama masü northeast states tem aser talisa Nagaland nung university agi anüngba mechi temaba jenjang nung maneni azüngtsü asoshi IGNOU ya institution tetemsü kumogo, ta pai ashi aser degree angurtem dang mapa bushir masü saka mapa agütsür ka-ka akumtsü ayongzuka liasü.

IGNOU indang 36 buba Convocation nung degree aser diploma certificate angutsüpur tazünger 1,002 pela agizükba o jembidang, Convocation sentong tongtiba ya New Delhi nung aliba IGNOU HQ nung amunger, ta Regional Director, IGNOU Kohima, Dr. Timir Tripathi-i ashi.

New Delhi nung iba sentong nung tongti tesemdangerji India Tir Droupadi Murmu aser tetushi tesemdangerji Minister of Education, Dharmendra Pradhan lir, ta shi.

Paisa convocation sentong ya Kohima Regional Centre densema Regional Centres 32 nung kasa mapang agir, ta metetdaksü.

Dr. Tripathi-i ashiba agi, Kohima Regional Centre kübok temsüa aliba kaketshir 1,002 rongnungi Master's Degree angur 633, Bachelor's Degree angur 129, Diploma angur 125 aser Certificates angur 115 lir.

Iba sentong nung degree certificates tem ya Prof. Ganga Prasad Prasain-i agütsü aser Assistant Regional Director, Dr. Mayonmi Shimray-i melepzüng o jembia liasü.

Hindi tesayurtem orientation sentong tembangogo



Dimapur, Rongchii/April 03 (TYO): Dimapur, Niuland aser Chumoukedima district tem nungi Hindi tesayurtem asoshi asemnü orientation sentong Directorate of School Education ajanga Samagra Shiksha Nagaland

den lungjemer ayongzükba March 31, 2023 nü tembangogo.

Iba sentong ya Kuda Youth Hall, Full Nagarjan, Dimapur nung agia liasü. Iba sentong nung Hindi tesayur 412 tashi training agia liasü.

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA

No. DET-7/116/2013

Dated Kohima, the March, 2023

ADVERTISEMENT

First International Job Fair to be organized by NSDC International
Under the Ministry of Skill Development & Entrepreneurship (MSDE) Govt. of India

Job Openings: Overseas employment in USA, Canada, UK, Europe, GCC, Western & South Asia, Japan, Australia, New Zealand, East & South East Asia.

Registration Open till 9th April 2023.

Interested aspirants are requested to register themselves in the below links.
<http://kaushalmahotsav.nsdcdigital.org/International/Candidate/>

Major Sectors Covered

Automotive	Drivers & Riders	Food & Beverage	HVAC	Plumbers
Agriculture & Horticulture	Electricians	Mechanics	IT	Technicians
Carpenters	Facility Manager	Health Care	Logistics	Welders
Construction	Extraction Workers	Hospitality	Oil & Gas	Retail & Service Delivery
International Cruise Liner	Refrigeration	Shipyard/Marine	Trade	

For any queries/ support please contact:

Helpline Number- **18001239626, 08800055555** (National Skill Development Corporation International)- New Delhi

Sd/- (KOVIMEYASE)NCS
Additional Secretary
& Ex-Officio Director (HoD)

Advertisement No. ADMN-13012/1/2017-ADMN

GOVERNMENT OF INDIA
MINISTRY OF DEVELOPMENT OF NORTH EASTERN REGION
NORTH EASTERN COUNCIL SECRETARIAT
NONGRIM HILLS, SHILLING-793003
Website : <https://necouncil.gov.in>

North Eastern Council Secretariat-i **deputation basis** nung inyaksü atema Stenographer Grade-II post 14 (terpezü) atema tetemsü officers bushir; **pay scale ji Rs. 5000-150-8000/(5th CPC)/pb-2 Rs.9300-34800/-plus Grade Pay of Rs. 4600/- (6th CPC) corresponding to pay scale of Rs. 44900-142400/- (Level 7) of the 7th CPC Pay Matrix ama asütsü.**

Shimba inyakyim aser temsüa aliba telatetbatem: 2nd Method. Deputation ajanga. Central sorkar mesüra State sorkar mesüra Union territories mesüra Statutory organization kübok item ama post mesüra iba post nung küm ti tashi regular service nung aliba officers aser scale of Rs. 4000-100-6000(5thCPC)/PB-1 Rs. 5,200-20,200/- + GPRs. 2400/- (6th CPC) corresponding to the pay scale of Rs. 25500-81100/- (level\$) of the 7th CPC Pay Matrix mesüra kasa anguba.

Deputation mapang telatet aser iba post atema arrshi küm telatet teimba: Iba appointment jakdang organization kar/Central sorkar departments nung Deputation mapang densema Deputation mapangji küm asem dak tema masütsü. Deputation atema appointment ji application agizükba tembangba tashi nung arrshi küm 56 dak tema masütsü.

Mapa nung shimba/iba post nung teinyaksü shilem: Senior officers atema PA ama inyaksü, English nung shorthand dictation aser computer nung type asütsü (English), Visitor's Diary achaayangtsü. Lemzüksüba tesem nung officers/sector/section indang dak aser registers file asütsü. Pa/la nem lemzüksüba/atatsüba officer(s) senzüsempangba (tour) osang tejangja file asütsü. Mapang shia pa/la nem lemzüksüba officer-i pa/la nem lemzüksüba tanga mapatem-a inyaksü.

Deputation indang pay aser tanga telatetbatemji DoPT's O.M.No. 6/8/2009-Estt. (Pay-II) dated 17.06.2010 aser No.2/11/2017-Estt. (Pay-II) dtd. 24.11.2017 ama asütsü. Cadre authorities/Head of the Departments dang temsüa aliba applications forward asütsü aser deputation basis nung inyaksü melunger candidates ji Employment News nung iba advertisement agütsüba anogo nungi tenzükba anogo 60 tsüngda I/C Deputy Secretary (Admn) dangi yoktsü tuyur. Iba advertisement indang tanga osang tejangjaji NEC indang website <https://necouncil.gov.in> nung angutsü.

Sd/-
(Tanung Jamoh)
Director (S & T) &
I/c Deputy Secretary (Admn.)

CBC 11104/12/0001/2324

Office of the
Mopungchuket Village Council

P.O. Impur, Mokochung, Nagaland

TENÜNGSANG AGÜTSÜR

Nagaland sorkar kübok nübur tenzükba wadang nung Industries & Commerce Department nung Director menden tongtetba atema Mopungchuket Village Council aser Mopungchuket Medemsanger Putu Menden ajanga lenir Wb. A. Temjen Jamir nem konang tenüngsang tulu agütsür.

Nai nendaka inyaktetba ajanga asen Mopungchuket Sensosanger ajak tejak tenteta pelasemer. Nübur tenzükba wadang mangdang tuluba nung tenzüksü anema aliba aser arishi mojang ta sarasademja onoki Tsüngrem taochi aser leniba meshizüksür.

Sd/-
Arentemsu
Council Chairman
Mopungchuket Village Council

On behalf of Medemsanger Putu Menden


1. Imyumeren Jamir, Tatar
2. Kartoshi Aier, Tatar
3. Kumsangyanger Ozukum, Tatar

COMMERCIAL LAND FOR SALE

Location: **Niuland Highway Attached**
Adjacent to upcoming Mega Water Park

Hozukhe Village, Niuland

100x100 @ 4.50 lakhs

Land Available upto 50 Bighas**Payments can be made in 2 installments****FOR DETAILS CONTACT : 9862954673**

India terenlok atema CBI teinyaksü khuret tulu lir: PM Modi

New Delhi, Rongchii/April 03

(Agencies): Democracy aser terenlok atema tetsükdaksü tulutibaji ochimashi lir; iba nungjagi India linük kümzüksü atema CBI teinyaksü khuret tulutibaji ibaji lir, ta Hombarnü Ato

kilonser, Narendra Modi-i metetdaksü.

New Delhi nung Central Bureau of Investigation (CBI) küm 60 ajungba Diamond Jubilee tetenzük sentong nung jembidang Ato kilonser Modi-i, par sorkari ochimashi anema raratsü asoshi yimtenren ajanga melungteter inyaker, ta ashi.

Linük aser nüburtemi ochimashi anema raradaksüner aser ochimashir ajak nem temerenshi agütsükdaksüner, ta pai ashi.

"Sorkari ochimashi sen aser miimshia kiojen aliba anema maparen tenzükogo. Onoki ochimashirtem anema raraba dang masü saka ochimashi tera/kulitem anema-a raradar," ta pai metetdaksü.

Tashi itta aliba rejutem melira terenlok India ka yangertsüji tamakoktsü, anungji CBI teinyaksü khuret tulu lir, ta Ato kilonseri ashi. "Tanü-a ken o ka mebentetra item ken oji CBI nem agütsütsüla, ta akhanger. CBI inyakyim aser tasa ajanga nüburtem nem tamang katetdaksüogo," ta pai ashi.

"Tajungertem atema tsükchir tulutibaji ochimashi lir. Ochimashi ajanga kinünger jak repranga inyakba aser kibongi yimsütsüba ajungkettsür. Iba anaji kanga bulua kümra linük tashi meitdaksür, kodang tashi meitlir ibaji ajanga terenlok mapa nung kongshir," ta pai ashi.

Rahul Gandhi-i court obendang anema temepishiba ken o benok

New Delhi, April 03 (Agencies):

Hombarnü Congress lenir, Rahul Gandhi-i tawa court kati pa anema obendang agütsüba anema local Surat court ka nung temepishiba ken o benokogo.

2019 küm Karnataka state kübok Kolar district nung election nüboyim sentong ka nung jembidang Rahul Gandhi-i, kechiba auer tenüng ajak nung Modi keta lir?, ta jembiba sülen pa anema tenüng menüksüba ken o benoka liasü.

Iba ken o nung taoba ita Surat District & Sessions Court-i Rahul Gandhi aitsü aser tepuokdak küm ana ayutsü obendang agütsü liasü. Ajistiaka Court-i April 13 tashi pa nem bail agütsü.

Advocate, Rohan Panwala-i, "Court-i pa (Rahul Gandhi) nem bail agütsüogo. Pa anema agütsüba obendanga soita atar. Iba ken o ya maneni April 13 nü angadangtsü," ta metetdaksü.

April 3 nü Rahul-i court obendang anema agütsüba temepishiba ken oji May 3 nü angadangtsü.

Temepishiba ken o court nung agütsüba sülen Rahul-i twitter ajanga, "Iba rara ya democracy kümzüksü atema lir. Iba rara nung ochiji kü hadir,

aser ochii ni nungiter," ta metetdaksü.

Court obendang anema agütsüba temepishiba ken o den külemi Rahul Gandhi-i ano tanga temepishiba ana agütsü; ka regular bail atema obendang agiena atatsü aser kaji court-i aitsüba obendang agiena atatsü atema lir.

Aitsüba obendang agiena atatsü temepishibaji agizükra Rahul Gandhi nem Lok Sabha MP menden tanaben agütsütsü. Court-i tenüng menüksüba ken o nung Ragul Gandhi aitsüba sülen pa Lok Sabha MP nungi anenja liasü.

Rahul indang lawyers team nungi advocate kati, "Aitsüba obendang agientsüji Rahul Gandhi atema kanga tongtibang. Iba temepishibaji magizükra Rahul maneni Lok Sabha züngsem masütsü. Court-i temepishiba ken oji April 13 nü angadangtsü," ta metetdaksü.

Rahul Gandhi indang lawyer Panwala-i, "2019 küm pai jembiba oji India nung tenüng nung 'Modi' keta nisung million aika tenüng menüksütsü nükjidong nung jembiba masü," ta ashi.

Hombarnep arrshi küm 52, Rahul aser teno, Priyanka Gandhi Vadra na commercial tayimtsü ka ajanga Surat (Gujarat)-i aoba sülen court nem temepishiba ken o agütsü liasü.



DIMAPUR BRANCH
Nyamo Lotha Road (Church Road)
Dimapur- 797112, Nagaland
Email: dimapu@bankofbaroda.com

[Rule 8(1)]

KIOJEN AGIADOKBA NOTICE

Securitisation & reconstruction of Financial Assets and enforcement of security Interest (section) Act, 2002 aser Security Interest (Enforcement) Rule, 2002 kübok Section 13 (12), Rule 8 & 9 nung agütsüba aliba tashi nung ajemdaker tsünglanglen sign süa aliba **Bank of Baroda, Dimapur Branch, Nagaland** authorised officer-i **22.12.2021** anogo nung **Demand Notice ka ajanga MR. SUBASISH DAS (BORROWER), Proprietor of M/s. New Zoom Colour Lab, T.S. Market, NL Road, Dimapur, Nagaland State- 797112 & MRS. SARBANI DAS (CO-BORROWER) House No.11, Sematilla Colony, Dimapur, Nagaland State- 797112** dang iba notice agütsüba anogo nungi tenzükba anogo 60 tsüngda notice nung shia aliba ama **22.12.2021** anogo tashi nung sentsüh **Rs.1,20,74,427.74 (Rupees One Crore Twenty Lakhs Seventy Four Thousand Four Hundred Twenty Seven and Paise Seventy Four Only)** agütsüba, ta tuyua liasü. Sen apuri seni magütsütet, anungji sen apur aser public dang, iba Act nung Section 13 kübok Sub-section (4) aser Security Interest (Enforcement) Rules, 2002, Rule 8 nung agütsüba aliba tashi amshia tsünglanglen sign süa aliri **2023 küm April 3** nü tsünglanglen shia aliba kiojen agiadokogo, ta sangdonger. Talisa sen apur aser public dang iba kiojen dak sendakba kecha inyaksangshi masütsü tuyur, aser yamaji inyakra seni Bank of Baroda indang asütsü aser ibaji **22.12.2021** anogo tashi nung sentsüh **Rs.1,20,74,427.74 (Rupees One Crore Twenty Lakhs Seventy Four Thousand Four Hundred Twenty Seven and Paise Seventy Four Only)** den külemi sen tetemlok aser tanga charges densema agütsü. Sen apur dang iba Act nung Section 13 kübok sub-section (8) nung ajemdaker mapang shidak nung item kiojen alangzüksü metetdaksü.

Sen apur indang osettsüset/kiojen osang tejangja
Patta No.629, Dag No. 13/730 nung Shri Subasish Das, S/o Himangshu Ranjan Das tenüng nung Block No.8, Mouza No.3, Dimapur nung aliba ali tasazük 1B-00K-00L (14400 Sq.ft.)

Bounded By:- North:- Huwato Chishi, **South:-** Sontosh Malakar, **East:-** Main Road, **West:-** Khehuto Kiba.

Date: 03.04.2023

Place: Dimapur

Authorised Officer
(Bank of Baroda, Dimapur Branch)



TIR YIMYIM YIMOBILEM (EDITORIAL)

DIMAPUR SANGTENNÜ, RONGCHII (APRIL) 04, 2023

Yi yokner o meyokdaksüner na

Nagaland nung 1989 kum nungi arogo nungertemi akang marem yi meyanglur aser mayoker. Ajisüaka, Nagaland nung yi ajembo manener, kechiyong yi yoka kibong mesürtema aika lir aser yi majem taküm meliteta purtema aikasa alitsü. Itemji kanga tia makaba purtem asütsü. Anungji, yi meyanglutsü aser mayoktsü özüng zünga liaka mayok maremba aser majema marimba pur jenti lir. Iba kuli jagi Nagaland government nung alirtemibo yi meyanglutsü aser mayoktsü nokdanga aliba ya kenyongi mali kuma agienner, ajisüaka magienteter, kechiyong arogo nung tsübur. Ajisüaka, tang bendang lima 20 nungi adenshia G20 mungdang alitsüba tenüng nung hotel tulutem nungbo yi ayoktsü Nagaland government-i melaogo, anungji tangbo jenjang tasak agi takar aser tulurtem anena chia-ajemdakbo yi talubosa angutsü. Iba telemtetbaji anema tang tashi nung Ao aser Konyak Baptist mungdang nati ola adokba angashiogo. Ano tanüngba arogo aser mungdangtemia kasa olaji adoktsü imlar. Atangji, Nagaland nung yi meyanglutsü aser mayoktsü latetba özüng ya government nung alirtem tangatetba aser temulungtetba agi lemtetba masü saka arogo nungertem tashi metizüktet nungnangseta yangluba özüng ka lir. Iba jagi tanü tashi government nung alirtemibo yi yokner saka arogo nungertemi meyokdaksüner ta asüba tetsüngda nung özüng agibo meyokdaksür saka nisungtemibo ayoker ta asüba tia ka nung yimten yimsüsürtem o arogo na meputepi kumogo. Atangji, arogo nungertem tangar masü aser pastoba-a masü saka government nung alirtemjia arogo nungertem lir, anungji arogo nung baptiba züngsem kati arogo nungertem tsübur peisasa pei tsübur amato asütsü. Iba onük ya kodang jungjunga bilemdangdir, yi mayoktsü özüng lateta liakasa ayoker aser ajemer, anungji ayoktsü melaang tajungba, kechiyong yi ayoktsü memelaba agi tayokertemi sen tasak meshir aser tesem aika nung yi tamajung angur, iba jagi nisung aika arishi temdoker ta jembirtemjia aitsütsü madoker. Ajisüaka, ano külen bilemdangra, kodaser arogo yi yanglutsü, ayoktsü aser ajemtsü lenmang lapoktsütsü, anungji arogo yi meyanglutsü aser mayoktsü nokdanga aser yi jemer aitsüba tim dang lir. Aji oda, asenok kari arogo yi nokdanga ya tim masüba mapa ka inyaker amato bilema lira, khen shisadangtsüla. Arogo dang masü saka asenok rongnunga shibaibo pei chirnurtem dang yi jemang ta ajungshitettsü? Aji oda, shibaibo pei chirnurtem dang yi yangluba aser ayokba mapa inyaksü ajungshitsü? Shibaibo yi ayoker aser yi ajemer nukshia repringtsü? Koba lima nung südir süaka, özüng raksartemji talitsüba, saka özüng raksar lenjii oa alitsü merangra, iba limaji özüng makaba lima kumadoktsü. Tatsüba agi, yimten nung ochimashi mapa inyaker nem temerenshi tulu agütsütsü asoshi özüng takang yanglua lir, saka ajaklen ochimashi mapa inyakba angur, ajangshir aser angashir, anungji ochimashi anema lateta aliba özüngtem ajak agientsü asü? Linük nung election nung sen agi vote mali, ochishia timi agitsü asoshi özüng takang lateta lir, saka asen lima nungbo MLA menden ya sen agi alia amener amato election nung sensa sen endoker. Iba kuli jagi election junga agitsü atema yanglua aliba özüngtem agientsü asü? Aji oda, yi meyanglutsü aser mayoktsü özüng shitak mamshitet tamakok anguba kuli agi Nagaland nung yi ayoktsü bilemra, ajia ano khen shisadangtsüla. Atangji, yi meyokaka, asenoki dang asen dak aliba kolok aser tashi amshia inyakra, asen lima nung aliba süng aser long ajak agi sen kuma inyaktetsü. Aji oda, yi ayok nung dang government takar akümtsü ama mebilemi, yi mayokyonga kodaser Nagaland takar kumdaktsütetsü ta bilemra, iba jagi Nagaland takar kumadoktsü. Otsü züngdangra, Nagaland ya yi jema tenzükbba state ka lir, iba jagi tanü tashi shia marur. Kodaser yi jemer kibong aser yi jemer lima takar kuma litetsü? Iba jagi angatetra, asenok ya yi mayokba agi takar makümer tabo tebilema mebilemtsü.

OLEMSABANG

ASEN NAGA NUNGER MELONGJEMBA AGI NUJISO YAMANGUR SUDI

~ L. Kika Pongener.

British yimli marutang nungi asen Naga kin ya tangar kin talenba küpok aliba otsü angashia maru, shinga kin-ia asen Naga nungertem atsüngdokba otzü mangashi, saka asenok kin o kin tsüngda tsükchitepba otzü tang angashia aru. Aji oda, tanüa asenok tsüngda meputepba ajanga nujiso bushiba mapa ya nukjidong metongteti lir. Otsüla oboula nungertem mezüng nujiso bushiba tenzükbba ya meyipa repringdangra, linuk tenzükertem dang ya parnok "Arem nung alir" ta aja, kechiaser parnokji arem nung lia timtema, sungolio agi chiyungtsü kümer, sungpok-lungpok agi parnok yipden kümer timtema nujiso bushiba mapa ya tenzükbba. Asenoki mezüng linuk tenzükertem den tanü linuk tenzükertem, libaliroba jenjang asadangra anung o ali na amai lir. Kodangsa 'Arem nung alirtem' yimdaki arudir yimsüsüri anir nubur ajungai kanga akümtsüba, parnok kidang aniketa chiyungdaksü aser anisungzüka mejangdaksü, aser Indian Sepoy yimdaki arura, tetsür tanüri dena parnok kodaser kumzüka ayutsü aser Indian Sepoy-tem nungi kumzüka jena yoktsü ta kanga anepalutepa, yaritepalia aru. Parnok nem yimer ajungai jenjang-menjang, nu, jang-otsü aser metsümersu sarutepa bener yok. Iba mapang nujiso bushir linuk tenzükertem telok ka dang liasü. Linuk tenzükertemji nuburtem nem timtem agütsürtem masü, nubur asoshi tetsübuttsü nisungtem masü, nuburtem reshikangshirtem masü, nuburtem amokmerenertem masü, saka arok asoshi bendanga agüja linuk tenzükertem liasü, aser Indian Sepoy-temji nubur ajaki parnok tsükchirtem ama züngshi. Anungji iba küsa tamang katetba aser kati ka akümtsübutepba sobaliba libaliro tajungji tanü-a linuk tenzükertem aser nutsüng nuburtem ajaki wazüka yua benshitetra, asenok tsüngda nung telongjem temeimtep tali alitsü. Anungji nutsüng nubur o linuk tenzüker na tsüngda temeim tesendaktep tajung akatsü kangasa tongtipang lir. Ajak dak alaka, linuk tenzükertem telok aika kuma melemsai ka kuma longjemtsü kanga tongtipang, aji oda, parnok ka kuma melongjem tashi, iba nujiso bushiba mapa ya tatempang telemtetba ka dangi maruttetsü sudi ta nuburi ajaki bilemer.

Asenoki asen Naga nungertem nuburtem aser kibongtem rongsenkettsüng jenjang asadanga repringdangra, noklang shilem nung tir (80%) shi sensakertem, oda tanü poksung aayanga alirtem, aser itasen tila agi kibong taküm mesua alirtem lir. Noklang nung shilem metsü (20%) shi dang taka-taitertem asütsü. Tesasatsüka, tanü asen Naga nungertem nujiso bushirtem telok 'Faction' aika kuma lemsaba agi saru-saji onsara kumadok, kechiyong telok tentet 'Faction' shia jagi kasasa saru molok sarutsüsa akümer. Ajiser, saru molok onsaraba jagi Naga nungertem 80% sensakertem jagi saru molokji makokba agi timtem marem ola adoker. Iba jagi, nuburtem nujiso bushirtem telok ka aser saru molok ka dang asütsüla ta ola adoker. Aji oda, iba olaji tebilemba tamajung kar agi masü, saka nuburtem noklang nung 80% sensakertem jagi timtem maremter. Tip külen asen Naga lima jila tulu ajunga nung sungküm (Gate) yanglur tema telung sorkar telok-tentet aikati shishilembartem dang temelen (Tax) sarur, aser shisilembartem iba saruji osettsüset jenjang (Price) nung inoker meshirji, osettsüset nung jenjang tupet atur, aser idangji Naga nungertem 80% sensakertemji sensak tiai lujen alur. Ano tip külen sorkar tenzükertem dang mapang shia itasen nungi telok ajungai percentage (%) meshirji sorkar tenzükertema tulurtem asoshibo balaka timtem mali, saka tilartem kanga tim-atemer.

Anungji tang asen Naga nungertem nubur ajunga taginuba olaji linuk tenzükertem telok ka dang asütsüla aser saru molok ka dang asütsüla. Aji oda, tang asen Naga nungertem tema telung sorkar ajunga kong kechi jenjang nung nokdaka lir (?)...ta shisadangra...kangasa temangmangtsüka aser tesungmangtsüka jenjang ka nung lir...!!!??? Tip külen Eastern Nagaland-puri 'State' balaka razüka aotsü akhanger, tip külen sorkar nung tatartem nujiso 'Solution' tenung ademer 'Opposition-less' sorkar yanglur, tip külen linuk tenzükertem telok tali tali kuma lemsar, ano tip külen nuburtem saru-saji zünraba agi timtem marem ola adoker....ta ongko madoktet, shisarama tzüji nung asonger ratamataba tia nung lir. Surabangla, Assembly nung tatartem nujiso nungdem nung anaben-aseben-buba tashi opposition maliba sorkar yangluba agi 'Solution' bener arutetba lir mali...!!!??? India nungertem British nungertem talenba nungi nujiso meshiba mapang par tamaren British nungertem 'Divide and Rule Policy' amshiba amai India nungertem-ia küsaji asen Naga nungertem daka amshir asü (?)...ta shisadanger. Aji oda, nujiso bushiba ya tatempang telemtetba ka maruteti tang amai atsülanga ora, ashiko, lia lia linuk tenzükertema telok aika kuma lemsatsü aser Nagaland State tilaka yagi Eastern Nagaland, Central Nagaland aser Southern Nagaland...ta lemsa-a aotsü kanga tsüba bilemer. Anungji teküatiba nung nujiso mapa ya tatempang telemtetba agitsü asoshi merangtsü ayongzüker.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger agateta agitsü mepishir**

Kathmandu Valley nung Khristantem atema leper mali timtemer



Nepal yimtiba, Kathmandu nung aliba Pashupatinath tekülem ki anasa arem ka nung Khristantemi tasü mang aremba noksa nung angur.

April 03, 2023: Nepal kübok Kathmandu Valley nung mangyimer Khristantem atema tebilemtsü tulubaji pei kibong züngsem mesüra kinünger sür ali nung aremtsü tebilemtsü lir.

Kathmandu Valley region nung yimti tulutiba asem den külemi jila aser yimtsüng noklang aika lir, ajisüaka Khristantem tasü mang aremtsü atema leper ka danga mali.

Iba region nung Khristan nütsüng 100,000 shi lir (National Christian Community Survey report).

Linük yimtiba, Kathmandu nung aliba British cemetery nung bendangertem dang rema lir aser Jesuit Khristantem cemetery joko mamshir.

Kathmandu nung aliba Koinonia Patan Arogo nung tongti, Suman Dongol-i, "Onoki tasü mangtem aremtsü makoker, ibayongji tasü mangtem mi nung dang rongdoker," ta ashi.

Nütsüng shilem 81 aliba Hindu nungertemibo tasü mang rongdoker aser Kathmandu nung Muslim nungertema

tasü mang aremtsü atema tekülem ki anasa leper ana lir. 1951 küm nungi Nepal nung Khristantem liasü aser iba mapang nungji sorkari yimsü meyipba anema ozüng benoka liasü. Küm ka shi lir India nung aliba Nepal nung Khristantem Nepal nung mezüngbuba Protestant Arogo amenoka liasü.

1970s tashi nungbo Nepal nung baptist Khristan 500 dak tema liasü aser Khrista osangtajung prokba atema küm 3 tashi tepuokdak ayu. 1990 küm tashi nungbo Nepal nung yimsü meyiptsü ozüng ajanga mela aser Nepal nung Khristan nütsüng 50,000 shi liasü. Tangbo nütsüng million 31 aliba linük nungji nütsüng shilem 3.5 bo Khristantem lir.

Kathmandu Valley region nung Khristantem tasü mang aremtsü leper meliaka Nepal anü doklen

Biratnagar nung aser anü olen tiptsütsü Butwal nungbo sorkari Khristantem tasü mang aremtsü atema ali agüja lir.

Nepal Christian Fellowship

nung lenir, Manoj Pradhan-i, "Khristantem tasü mang aremtsüsa leper malibaji Kathmandu Valley dang lir," ta ashi.

Yamaji Khristantemi kinüngertem tasü mang aremtsü atema leper manguba ajanga asüpila sentonga junga magiteter. 1990 küm April ita nungi Khristantemi akhidang aliba Hindu Pashupatinath tekülem ki anasa arem nung tasü mang rema aru, saka 1998 küm iba tekülem ki ya UNESCO heritage site, ta sangdongba sülen nungibo sorkari iba arem nung tasü mang aremba nokdanga liasü.

2009 küm Khristantemi longkak aitba sülen ketdangsertemi ano maneni Shleshmantak arem nung tasü mang aremtsü mela saka Hindu nungeri ibaji anema longkak aitba sülen 2011 küm sorkari iba arem nungji tasü mang aremtsü memela.

Protestant pastor kati, "Iba tebilemtsü onük atema Khristantem longjemra asenok taginüba ataloktsü," ta ashi.

ANOGO ABEN TSÜNGREM DEN

Parnok Tsüngremi aniba nung anidak

Parnoki parnok shisatsü nung mezüngbuba Tsüngrem tiyongtsü südaktsür Pai aniba nung anidak. Messiah atema shinba parnoki koda angazük asenoki memetet. Tsüngremi parnok Kinü Yisu dangi anitsü ta amang, asenoki aji dang metetet. Anü ng nung aliba temangtem metetta alibaji shisa akar yimya liasü. Parnoki tasen Chuba asoba temaitsütem anogo aika anü ng nung bushir alitsü südi. Petinui anibaji parnoki Tsüngrem temeyong agi parnok aniba ama parnoki agizük.

Tsüngremi aniba nai metetta lir ma? Iba ochi iba anogo nungi tanü tashi memelenshir lir. Shibai Tsüngremi aniba nung anidaker pa/la shidakba shisa taka lir. Anü doklen nungi item tashi temetettertem nem leman atema mapa magütsü, parnok nem petinu dang ka agütsü. Parnoki tesangwaji dang anidak, aser ibaji asoshi Tsüngremi parnok dang pela. Kari ashir, "Tsüngremi mulungba talang nung lia metettsü asoshi asenok jilia talang ka orr atatsüla." Ibaji shidak masü! Tsüngremi asenok nem jili leman mesayur, saka Pai asenok mera shiaji anüker.

Pai ne leman anitsü, A. Shin züluri ashir (A. Shin 3:6). Tsüngremi Israel chirtem nem anü ng mepet tongshi ka aser aonung mi tongshi ka parnok anitsü asoshi agütsü. Pai shisa kartem nem petinu dang ka agütsü. Tanü Pai asenok den yamaji meinyaker, saka asenok jakdang Pa aotsü Pai nangzüka lir. Asenoki Kibuba tsütsü mera ka aotsü mulungra Pai asenok tsütsü mera ana arutsü. Tanü shirnoki Tsüngremi aniba nung anidaker parnok shisa akartem lir.

India nung yimsü balala nungi lenirtemi kasa kiyimba anemer

April 03, 2023: India nung Khristan lenirtem densema tamangba yimsü balala nungi lenirtemi tetsür o tetsür na mesüra tebur o tebur na kiyimba (kasa kiyimba) ozüng anema nokdaker.

Yimsü balala nungi lenirtemi, kasa kiyimbaji tim masü aser yimsü anema lir, ta ashi.

Tetsür o tetsür na mesüra tebur o tebur na kiyimtsü atema ozüng ajanga temelaba agüjang, ta temepishiba ken o aika Supreme Court nung benoka lir, aser April 18, 2023 nüa maneni Supreme Court-i item ken o angadangtsü.

Khristan telok- Communion of Churches-i shidi ka ajanga linük Tir, Draupadi Murmu dang India nung ozüng ajanga kasa kiyimba memelatsü mepishi.

Muslim nung telok Jamaat-e-Islami Hind-ia shidi ajanga Supreme Court nem kasa temepishiba agütsütsü

tebilemba lir.

India nung Hindu, Buddhist, Jain aser Sikh yimsü lenirtemia kasa kiyimba tebilemtsü onük anema ola adokogo.

April 3, 2023 nü osangbener den jembidang Delhi Arogo kübok Commission for Ecumenism and Interfaith Dialogue nung tongti, Felix Jones-i, "Kasa kiyimba onük nung lokti aser yimsü balala indang tangatetba balala alitsü. Arogo tesayuba kübok kiyimbaji tetsür ka aser tebur ka na tsüngda dang lir, aser iba tangatetba nungjagi Arogoi mainshitsü mesüra atsü-anem makatsü," ta metetdaksü.

Khristan putir, Jones-isa, "Kasa kiyimbaji tim masü aser tangatetba tai," ta ashi.

Osangbenr den jembidang Jamaat-e-Islami Hind nung tatong Tir, Mohammad Salim Engineer-i, "Kasa kiyimbaji onok libaliroa aruba den

mepetep aser ibaji ajanga loktiliba nung tamajung dang adokdaksütsü, kechiyong kiyimbaji tebur aser tetsür ka tsüngda dang lir," ta ashi.

Paisa, "Onoki India nung Muslim nung tongti telok- All India Muslim Personal Law Board ayongsemer Supreme court nem temepishiba agütsütsü," ta metetdaksü.

Tang India nung kasa tetsür o tetsür na mesüra tebur o tebur na kiyimba melatsü atema ozüng mali, ajisüaka 2018 küm September ita nung Supreme Court obendang ka ajanga, tetsür o tetsür na mesüra tebur o tebur na tangatetep nung shi nung medembabo ozüng alema aibelenba masü, ta metetdaksa liasü.

India nung kasa kiyimba ozüng ajanga melatsü atema Supreme Court nem temepishiba ken o 18 agüja lir. Parnoki, 2018 küm obendang

ajanga kasa o kasa na shi nung medemtsü melayonga linük nung kiyimtsübo memelar, ta ashi.

Tamalen Indian Parliament of Religions Tir, Goswami Sushil Maharaji-i, "Ozü yimsü (Hindu) ajanga kasa kiyimba memelar. Anungji kechiba onoki ibaji melatsü atema shisadangtsü," ta metetdaksa liasü.

New Delhi nung Bangla Sahib Gurudwara nung tongti putir, Singh Sahib Giani Ranjit Singh-i, "Onoki ibaji anema nokdaker, iba ya shisadangtsü makok, kechiyong onok yimsü (Sikh) kübok ibaji mebenshir," ta ashi.

Tiber House nung Director, Dorji Damdul-i, "Iba ya ozüng alema lir aser onokia tangar ama ibaji anema nokdaker," ta ashi.

Jain yimsü tesayur, Acharaya Vivek Muniraj-i, "Tanur soa soyapokyabaji kiyimba tamendakdak lir, aser

kasa kiyimba ajangabo ibaji tamakoktsü," ta ashi.

Taoba ita tetenzüklen Centre sorkari India nung kasa kiyimba anema Supreme Court nem affidavit ajanga telangzüba agüja liasü, iba sülen Arogoi sorkari nem tenüngsang agütsü.

Sorkari SC nem ibaji anema telangzüba agütsüba atema tenüngsang agüja Khristan lenir kati, tetsür o tetsür na mesüra tebur o tebur na kiyimba ya tim masü, ta Arogoi züngshir aser magizükteter, kechiyong Tsüngremi asenok dang kibong kaji tebu ka, tetsü ka aser tanurtem asütsü sayur, ta jembia liasü.

Taoba ita Supreme Court-i, iba ken o ya temzüng dak sendakba ken o ka lir, anungji April 18 nungi tenzüka Supreme Court nungi züngsem pongui akümba constitution bench kati item ken otem angadangtsü, ta metetdaksüo.

AO OSHI ANGAZÜKDAK:
TANÜ ANGAZÜKTSÜBA OJANG



Pokdak

(adj) tebok nung chiyongmong aket maket (level of energy after having food)

* Sotsü ayongba agibo **pokdak** mamonger.

Pokji

(n) modong nung tsük tanglok (grain on the stalk)

* Modong nung **pokji** tanglokba agi alu majunger.

OLONG PAITEP # 6477

1		2			3		4		5
				6					
	7		8						
9					10			11	12
			13		14	15			
16					17			18	
				19	20				
21		22							23
24									

TIPIEN

- 1. Saku - (4)
- 6. Songjen - (7)
- 7. Mali/Tazüing - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüing kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüingdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. --- tatsü - (3)
- 12. Tebur kidong aser zünga kasa tsüingda jatepba - (4)
- 14. Pela agizukba lapu ka - (5)
- 15. Tenüing atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6476 TELANGZÜBA


TIPIEN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

LANGTSÜNGLEN :

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüingdak, 10. Yongya,
- 11. Kongro, 13. Ora, 14. Ata.

Agüja aliba noksa nung meputepi aliba 4 bushiang



Tanur asoba anogo nung salem osang den noksa angati adokdaksünöra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Assam nung ano Lat Mandal kati süpokrem agidang apu



Guwahati, April 3, 2023

(Agencies): Directorate of Vigilance and Anti-Corruption, Assam-i Lat Mandal ka süpokrem agiba atema puogo.

Badarpur, Karimganj nung circle officer indang office nung vigilance ketdangsurtemi Lat Mandal apu. Pa ya

Joyshab Hussain Laskar ta jangjaogo.

Laskar-i land mutation mapa inyaksü atema nisung ka dang süpokrem meshi.

Taoba hopta Directorate of Vigilance & Anti-Corruption, Assam-isa Lat Mandal ka apu. Kamalpur Revenue Circle

nung Lat Mandal-i land sale permission agütsü atema süpokrem meshia agidang apu.

Tetsür Lat Mandal yagi nisung aika dang nungi süpokrem meshia agi aser iba atema la apu. V&AC, Assam-i lai süpokrem meshia agidang apu.

Assam nung anogo 7 tsüingda kilometer 17 lenmang yanglu

Diphu, April 3, 2023

(Agencies): Assam kübok Karbi Anglong district nung anogo tenet tsüingda Rs 30 crore agi kilometer 17 gari lenmang ka yanglu saka iba paper nung dang lir.

December 22, 2020 nü additional chief engineer, PWD (R&B) Hills, Assam ajanga Kache Construction (OPC) Private Limited nem work order agütsü.

Karbi Anglong kübok Diphu-Dillai-Sarihujan Road (Birola to Rongplimlam) kilometer 17 talang lenmang yanglutsü atema mapa lemzüksü. Iba sülen December 29, 2020 nü PWD Road division, Diphu ajanga completion certificate agütsü.

Kache Construction ya BJP lennir Tuliram Ronghang'er jabaso Singdon Ronghang indang lir aser Tuliram ya Karbi

Anglong Autonomous Council nung Chief Executive Member (CEM) lir.

Osangbenertemi Tuliram Ronghang dang iba tesüingmangtsü mapa inyakba osang metetpeladang tim masüba inyakba kecha mali ta ashi.

"BJP MLA Prasanta Phukan lenisüba kübok züingsem 6 agi akümba Assam Assembly committee kati ita asem tejakdang lenmang repringdangogo. Iba luden nung Congress aser AIUDF MLA tem dena liasü asr parnoki chief minister dang mapa tajung inyakba osang agütsüogo" ta Tuliram-i ashi.

Ajisüaka, osangbenertemi Phukan dang "good job" report indang asüingdangdang "iba lenmang atema bushisüingdang

kecha masü" ta pai langzü.

"Onoki iba lenmang tua mereprangdang. Anogo kwi nung yangluzük'ar onoki memetet. Ajisüaka onoki lenmang tajung ka angu aser sorkari detailed report atema vigilance enquiry ka tuyutsüla. Onokibo tema nungi dang repring" ta Phukan-isa ashi.

"Anogo 7 tsüingda kilometre 17 lenmang ka yanglutsübaji tamakoktsü. Nisung kari bitumen amshi nunga anogo tenet nung merenemttsü" ta retired PWD ketdangsur kati ashi.

Sorkar contract teimbaka Kache Construction aser Inglong Enterprise nem dang lemzüksür ta ken o lir. Inglong Enterprise ya Tuliram Ronghang tenu Robiram Ronghang indang lir.

Cachar nung Rs 50c crore alang Yaba süngjang apu



Silchar, April 3, 2023

(Agencies): Assam kübok Cachar district nung police-i Rs 50 crore alang Yaba süngjangtem ngutetogo aser iba dak sendakba nung nisung ana pua lir.

Myanmar nungi shibelenba Yaba süngjang lakh 5 tashi apu. Mozü ya Myanmar nungi Mizoram adena India-i bener aruba liasü aser tesem balalai

yoktsü lia apu, ta police-i ashi. "Osang tejangja ka angazükba sülen police telok kati Hombarnü Bhagadhar nung Rubel Hussain Mazumder'er ki mita ao aser idangji Yaba süngjang lakh 5 ngutet" ta Cachar superintendent of police Numal Mahatto-i ashi.

"Yaba süngjangtemji Myanmar nungi Mizoram ajanga India-i bener aruba

liasü aser state balalai yoktsüba liasü. Yaba süngjangtemji packet 50 nung enoka liasü. Rubel aser tenu Saidul Hussain Mazumder na puogo" ta Mahatto-isa metetdaksü.

"Tesüiba ita tenet tsüingda onoki Rs. 1200 crore alang drugs puogo aser mozü shibelener nisung 100 tema puogo" ta paisa ashi.

Assam chief minister Himanta Biswa Sarma-ia social media nung social media nem tenüingsang agütsüogo.

"Cachar Police-i Bagador, Silchar nung Yaba lakh 5 puogo. Iba dak sendakba nung nisung ana pua lir. Assam Police-i mapa tajung inyakogo aser maneni inyakang" ta CM Sarma-i ashi.

Taoba ita Assam Rifles sepaitemia Mizoram kübok Champai district nung Rs 390.4 crore alang drugs apu.

**Office of the
Tongpok Semchir Pongen Mungdang**
H.Q. Mokokchung: 798601: Nagaland

TENÜNGSANG AGÜTSÜR

Lenir T. N. Mannen aser lenir Temjenmenba nati 14 buba Nagaland Legislative Assembly General Election nung 23 Impur Assembly Constituency aser 29 Jangpetkong Assembly Constituency nungi takok tulu ngutetba den Wb. Takatemjen Pongen, Chubatoba Pongen jabaso ajanga government of Nagaland, Department of Personal and Administrative Reforms kübok Extra Assistant Commissioner menden ajangzükteta kidongsanger nem konang nüngsang tulu bener arutsüba atema Tongpok Semchir Pongen Mungdang-i kanga pelar aser tenüngsang agütsür. Nenok takok tajung ajanga asen kidong tejak tentetdaksüogo.

Maneni, nenok tarutsü wadang ajak nung Tulusang Tsünnngremi len ania moatsütsü asen kidong tamang aser sarasadem.

Sd/- **Sd/-**
Guru Bendangwati **Meyatoshi**
President, TSPM **General Secretary, TSPM**

**Office of the
Ungma Village Council**

PELABA LEMSATEPER

Ungma Senso tajung ana Dr. Watizulu Jamir (Chairman DAN) Dr. Chuba Imsong (Chairman MARCOFED) menden tajung agütsü nung asen lenir Shri. Neiphui Rio Chief Minister, Shri. Chingwang Konyak President NDPP, Shri. Sharingain Longkumer Speaker NLA parnok ajak dang pelaba lemsateper. Tsüngremi asen lenir taküm aser kibongtem tali moajangma ta sarasadema atar.

Sd/- **Sd/-**
Nungshilepten Jamir **Takoyanger Jamir**
Chairman **Secretary**

Montenegro tir election nung Milatovic-i takok nguogo

Podgorica, Rongchii/April 03 (Agencies): Montenegro nung taoba Economy Minister Jakov Milatovic-i tir election nung takok nguogo ta sangdong, shibai mapang talangka yimsü süa arusang Milo Djukanovic tsükdaktsü. Djukanovic-i iba Balkan linük tilaka nungya küm 30 dak tema yimsü süa aru.

Milatovic ya Montenegro nung tang yimsü tesüdak telok nungi timbai yaria liasü aser pai Deobarnü agiba vote shilem 60 shi angu aser Djukanovic-i vote shilem 40 shi angu, ta Centre for Monitoring and Research ajanga ashi.

"Küm 30 dak tema asenoki ataa aruba aonungji taonung ya lir. Küm pongu tsüngta Montenegro ya European Union nung dendaktsütsü," ta Milatovic-i linük yimtiba, Podgorica nung par right-centrist Europe Now Movement party headquarters nung pa yarirtem dang ashi.

Arishi küm 37 tain Milatovic yagi ochimashi azüoktsü, nüburtem takum jenjang tajungba kumdaktsütsü aser EU aser taoba mapang Yugoslav

republic nung külemi aliba linük, Serbia den tesendaktep yanglutsü ta nangzüka nübuyima liasü.

Podgorica yimti nung pa yarirtem kar yimti tiyong nung adenshia gari nungi ola agütsü aser kar fireworks tsüklok mesüra anünglen injang khashishia liasü.

Arishi küm 61 tain Djukanovic ya Montenegro nung küm aika yimten tejak sür jenjang balala nung melentepa inyaka aru aser paia Milatovic makokba agizükogo. Pa ya tir aser ato kilonser mapang balala nung melentepa inyaka liasü.

"Montenegro-i pei jangraba shimogo aser ni aji akumtsübor aser Jakov Milatovic den takok tepela lemsarteper," ta Djukanovic-i Podgorcia nung par Democratic Party of Socialists (DPS) headquarters nungi ashi.

State election commission ajanga iba osang ya anogo ishika tsüngta sangdongtsü imlar.

Hopta ana tejakdang voting round mezüngbuba nung Djukanovic-i pa den tokteper

aika tsükdaktsü. Iba mapang pai vote shilem 35 ngua liasü aser Milatovic-i shilem 29 nguteta liasü.

Deobarnü takoksa ajuruba ya Djukanovic asoshi takoksa tulutiba liasü, shibai 2006 küm Serbia nungi Montenegro nüjiso anguba asoshi pa nem tenüngsang agütsü lir.

Ajisüaka Djukanovic aser par DPS yagi mapa tamajung aser ochimashi agi lokti süngdaktsü, ta parnok anemer temi ashir.

Montenegro indang tir ya küm pongu atema shimer aser pa jenjang ya timba sentong balala atema lir, saka yimten tashi tuluba ato kilonser dak keta lir.

Deobarnü election nung Milatovic-i lanurtem atsür arutet, shirnoki linük lenisüba nung tejak tasen aginüa liasü.

2016 küm mitkar tashi amshia sorkar atsüngdoktsü merangba sülen Montenegro ya NATO nung aden, koba Djukanovic sorkari Russian agents aser Serbian nationalists tenüng sena liasü. Moscow-i tiazi nung tai tongloktsür ta aitsü.

Taoba küm Russia-i Ukraine amak tenzüka sülen Moscow nem EU-i tenokdangba agütsüba nung Montenegro dense maser parnok Russian diplomats aika linük nungi meindok. Kremlin-i par 'list of unfriendly states' tem nung Montenegro ya inoka lir.



Imphal Circle Office, Kwakeithel Thokchom Leikai, Imphal, e-mail: cs946700@pnb.co.in

Imphal Circle Office, Kwakeithel Thokchom Leikai, Imphal, e-mail: cs946700@pnb.co.in
Whereas, the undersigned being the Authorised Officer of the Punjab National Bank under the Securitisation and Reconstruction of Financial Assets & Enforcement of Security Interest Act, 2002, and in exercise of powers conferred under Section 13 read with the Security Interest (Enforcement) Rules, 2002, issued demand notice/s on the dates mentioned against each account calling upon the respective borrower/s to repay the amount as mentioned against each account within 60 days from the date of notice(s)/ date of receipt of the said notice(s). The Borrower(s)/Guarantor(s)/Mortgagor(s) having failed to repay the amount, notice is hereby given to the Borrower(s)/Guarantor(s)/Mortgagor(s) and the public in general that the undersigned has taken possession of the property described herein below in exercise of powers conferred on him/her under sub section(4) of Section 13 of Act read with Rule 8 of the Security Interest(Enforcement)Rules,2002 on the date mentioned below against their names. The Borrower(s)/Guarantor(s)/Mortgagor(s) in particular in general and the public in general is hereby cautioned not to deal with the property/ies and any dealing with the property/ies will be subject to the charge of Punjab National Bank, respective branch offices for the amounts mentioned against each account along with further interest and other charges dues thereon, including all the costs incurred during SARFAESI action. The Borrower(s)/ Guarantor(s)/ Mortgagor(s) attention is invited to provisions of sub-section (8) of section 13 of the Act in respect of time available to redeem the secured assets.

Sl.No.	Name of the Branch Name of the Account	Name and address of the Borrower(s)/ Guarantor(s)/ Mortgagor(s)	Description of the Immovable Property/ies	Date of: Demand Notice Possession Notice	Amount outstanding as per Demand Notice
1.	Dimapur Branch (BO 045120) Zhimomi V Hokato	Zhimomi V Hokato, S/O Shri SV Zhimomi, R/O House No. 206, Hero Honda Servicing Centre, River Belt Colony, Dimapur - 797112, Nagaland	All the part and parcel of Landed property measuring 00b-03k-07Ls in the name of Zhimomi V Hokato, under DAG No.629, Patta No.434, Mouza No.2, which is bounded on the North by: Plot of Don Bosco School, South: Main Road, East: Plot of Mrs. Tovii, West: Plot of Ungma Women's Building	04.11.2022 03.03.2023	Rs. 19,83,422.85/- With further interest and other charges dues thereon
2.	Dimapur Branch (BO 045120) Tali Yanger	Mr. Tali Yanger S/O Mr. Lt. Imnasashi H/No. 358, PWD Colony, Dimapur Nagaland - 797112 Mrs. Imlimenla Ao W/O Mr. Tali yanger H/No. 358, PWD Colony, Dimapur Nagaland - 797112	1. All the part and parcel of Landed property measuring 00B-00K-12Ls in the name of Tali Yanger Ao, under Dag No.957, Patta No.843, Mouza No.2, which is bounded on the North by: Plot of Sri Imti, on the South: By the Plot of PWD Road, on the East: Plot of Shri Imlimenla, on the West: Plot of Shri Limsula 2. All the part and parcel of Landed property measuring 00B-00K-12Ls in the name of Imlimenla Ao, under Dag No.1259, Patta No.1215, Mouza No.2, which is bounded on the North by: Plot of Imlimenla Ao, on the South: By the approach road, on the East: Plot of Shri Lanu, on the West: Plot of Shri Tali Yanger 3. All the part and parcel of Landed property measuring 00B-00K-19Ls in the name of Imlimenla Ao, under Dag No.1414, Patta No.1258, Mouza No.2, which is bounded on the North by: Plot of Kimala, on the South: Plot of Imlimenla, on the East: Plot of Shri John, on the West: Plot of Shri Imti Ao.	29.07.2022 03.03.2023	Rs.33,74,240.99/- with further interest and other charges dues thereon.
3.	Dimapur Branch (045120) Kimala Ao	P.Kimala A o , H / N o . 6 5 , P W D Colony, PO Dimapur- 797112, Nagaland P.Chuba Yaden, H/No. 65, PWD Colony, PO Dimapur- 797112, Nagaland	All the part and parcel of Landed property measuring 17 Lochas in the name of Kimala Ao, under Dag No.927, Patta No.817, Mouza No.2, Touzi-Block No.9 which is bounded on the North by: PWD Road, on the South: Land of Mr. Yanger, on the East: Land of Mr. Rongsen Ao, on the West: By the land of PWD	04.11.2022 03.03.2023	Rs.29,64,368.00/- with further interest and other charges dues thereon.
4.	Dimapur Branch (BO045120) Mhao Humtsoe	Mr. Mhao Humtsoe, S/O Mr. Woremo Humtsoe, 103 Fellowship Colony, Dimapur, Nagaland-797112 M s . P e t e n e i n u o Solo (Guarantor), D/O M r . L t . K e v i m e b o Solo, Fellowship Colony, Dimapur, Nagaland- 797112	All the part and parcel of Landed Property in the name of Mhao Humtsoe under Dag No.1595, Patta No.1381, Revenue Village No. Mouza No.2 measuring an area of 00B-02K-05Ls (602 Sq Mtr) which is butted and bounded by at North: Private Land and Rengma Church, South: Land of Thomas Ngullie, East: Lowland (Marshy Land) West: Approach Road)	31.10.2022 03.03.2023	Rs.3,24,501.09/- with further interest and other charges dues thereon.

Date: 10.03.2023
Place: Imphal
Chief manager cum Authorised Officer Punjab National Bank

Malaysia nung tasüba temerenshi agentsü

Kuala Lumpur, Rongchii/ April 03 (Agencies): Malaysia indang parliament-i linük nung tasüba temerenshi agentsü vote agütsütepogo, anungji tasüba temerenshi agütsütsü alir nisung 1,300 dak tema takum kumzütsü.

Iba linük nung tasüba temerenshi agütsüba 2018 küm nungi khen atema agiena lir.

Saka iba ozüng agienba ajanga nisung tepsetba aser kiralongra mapa inyakba densema mapa tamajung 11 atema kechi südir süaka tasüba temerenshi agütsütsü ta aliba temerenshi agiener.

Ajisüaka ken o kar nungbo tasüba temerenshi agütsütsü obendanger nem tashi agütsür.

Joko mapa tamajung inyakba timbaka atema court temi küm 40 tashi ang tepuokdak ayutsü, mesüra süng agi azükba temerenshi ang agütsütsü, ta ozüng yanglurtemi ashir.

Hombarnü parliament nung jembidang Malaysia indang deputy law minister-i ashiba agi, tasüba temerenshi ya paidoktsü makokba ka liasü aser mapa tamajung inyaktsü asoshi tetsübotsü ozüng ka ama meliasü.

(Maneni tapak 8 nung...)

Mauricio-i Odisha FC den kum 2 atema tenangzüktepba yanglushi

Rongchii/April 3, 2023 (Agencies): Brazil nunger striker Diego Mauricio-i Odisha FC den ano kum ana atema tenangzüktepba yanglushiogo aser pa iba club nungi 2025 kum tashi asayatsü, ta club sangdong ka ajanga Hombarnü metetdaksü.

Mauricio shibai Indian Super League (ISL) 2022-23 season nung Odisha FC atema goal 12 idaktsü, pai golden boot ngua club nungi iba narokum agizükba mezüngbuba asayar kumogo.

Club nungi season tanabuba asayaba mapang asayamung tetenzüklen pai junga masayatet, ajisiuaka asayamung tatemlen kanga junga asaya Odisha FC pur takum mezüngbuba playoff tonga asayaba nung teyari tulu agiija liasü. Ibayongji Bhubaneswar nung amendaker aliba club yagi pa den tenangzüktepba yanglushiogo.

Mauricio ya Odisha FC puri 2020 kum alizük aser mezüngbuba season nunga pai



goal 12 idakja liasü. Iba sülen pa 2022 kum January ita Mumbai City FC-i ao. ISL 2021-22 nung pa Mumbai City FC nungi asaya tenet nung shilem agi aser goal asem idakja liasü. Paisa, AFC Champions League nung Mumbai atema goal idakja parnok iba asayamung group stage nung asaya ka akokba mezüngbuba India nunger club akum.

Brazil nunger asayar ya maneni 2022-23 metenzük tsüngda Odisha FC-i meyipa aru aser 2021 kum pai club toktsür aoba mapang ama maneni kanga junga asaya liasü. Odisha FC den

tenangzüktepba yanglushiba atema kanga pelaba Mauricio-i lemsatepogo aser ashiba agi iba club ya ki ama bilemer.

"Ni Odisha meyong lir. Ni yimti aser nübürtem meimer. Fan temi parnoki ni koma meimer aji sayuogo. Ni club metoktsütsü atema telemtetba agiba agi ozü kinungertem kanga pelar. Ni idaki jangradema asayaogo aser maneni jangradema asayatsü yongya atar. Onok longjemer takok tajung angutsü ta ni amanger," ta pai ashi.

Odisha FC pur Super Cup nunga asayatsü lir anungji Mauricio-i team nem takok agütsütsü atema maneni kanga junga asayatsü imla alitsü. Odisha FC pur iba asayamung nung Hyderabad FC, East Bengal FC, TRAU aser Aizawl FC den asayatsü ata lir.

Super Cup nung Odisha FC pur mezüngbuba asaya Deobarnü East Bengal FC den asayatsü.

Premier League: Brendan Rodgers-i Leicester City toktsüogo

Rongchii/April 3, 2023 (Agencies): Leicester City aser manager Brendan Rodgers na tangatetep nung pilaogo, ta Premier League club yagi Deobarnü sangdong ka ajanga metetdaksü. Leicester pur PL nung tang jenjang 18buba nung lir aser relegate asütsü ana nung lir.

Rodgers lenisüba nung Leicester pur tatema Honibarnü Crystal Palace den asaya, koba parnoki goal 2-1 agi mekoki liasü. Iba asaya makokba sülen parnoki asaya 28 nungi point 25 dang nguteta lir.

2015-16 season nung parnoki meimlai Premier League akok ajisiuaka season teku sülen parnok relegate

asütsü ana nung lir. "Tang asaya aliba season nung onoki imla aliba dang nungi tamajungba asayadar. Tia melenshitsü atema jenjang agitsü nüngdaker ta onoki amanger," ta Leicester mendenbuba Aiyawatt Srivaddhanaprabha-i ashi.

"Tesasaytsüka imla aliba ama terenlok kecha mali aser season nung asaya 10 asayatsü anunga lir aser Premier League jenjang kumzuka ayutsü atema Board-i tanga jenjang agitsüsa dang kumogo," ta paisa shisem.

Scottish club Celtic nung Premiership ana domestic asayamung asem anaben atonga akokba sülen Rodgers

ya 2019 kum February ita Leicester nung arua aden.

Pa lenisüba nung Leicester puri 2021 kum mezüngbuba FA Cup koka liasü. Parnoki final asaya nung Chelsea koka liasü.

"Brendan lenisüba nung team-i takok anguba ajanga pa mapa sayur," ta Srivaddhanaprabha-i ashi.

"Pa lenisüba nung takok tajung aika ajangshiogo aser pa aser pa staff tem dang teti parnok teyari asoshi club-i pelatsü," ta paisa ashi.

Assistant manager Chris Davies-ia club toktsüogo aser coach Adam Sadler aser Mike Stowell na lenisüba nung team training agia atatsü.

Graham Potter mapa nungi anentsüogo

New Delhi, Rongchii/April 3 (Agencies): Premier League club Chelsea-i Deobarnü coach Graham Potter mapang nungi anentsüogo. PL table nung jenjang mejungi akumba sülen pa mapa nungi anenja liasü.

"Graham Potter-i club toktsüba Chelsea FC-i sangdonger. Graham-i inyakyim anepa anepa aotsü atema club den longjemer inyaksü mulunga agizükogo," ta club sangdong ka ajanga metetdaksü.

"Graham-i inyakteta toktsüba aser merangdanga inyakba ajak atema Chelsea-i pa dang kanga pelar aser tarutsü nung takok nguyonga aotsü imlaja atar," ta kasa

sangdong ajanga metetdaksü. Honibarnü kidang Aston Villa goal 2-0 agi makokba sülen Chelsea pur table nung jenjang 11bubai asepzüka alu.

Arishi kum 47 tain Potter-i September ita Thomas Tuchel melena Chelsea coach mapa agizüka liasü. Pa Brighton nung kum asem kanga takok ngua inyakba sülen Chelsea-i ao.

Domestic asayamung nung junga masayatetaka pa lenisüba nung team pur Champions League nung quarter-final tongtetogo aser parnok Real Madrid den asayatsü.

Honibarnü tamakok anguba sülen Potter-i pa mapa nungi anentsütsü asütsü ta meteta

akum. "Ni shinga daka tai metongloksür. Iba khuret ya ni abentsüla," ta Potter-i ashi.

"Club pusemertem jashiba onoki angateter. Kidang kodang tamakok ngudir nübürtem kanga tezü adanger aser jashir."

"League table nung tang onok kechi jenjang nung ali iba atema shinga mepelar. Taitüsüba kechisa arudir ni agizüktsüla," ta pai ashi.

"Onoki Graham ya coach ka aser nisung ka ama kanga kumtsübur. Pai professional ka ama inyaksangshir aser tang iba jenjang agiba atema onok ajak tezü adanger," ta co-owners Todd Boehly aser Behdad Eghbali nati ashi.

WTA rankings: Petra Kvitova maneni Top 10-i iogo

Rongchii/April 3, 2023 (Agencies): Hombarnü sayaba WTA rankings nung taoba world No. 2 asayar Petra Kvitova-i Miami Open akokba sülen maneni top 10-i iogo. Tetsürtem rongnung Iga Swiatek maneni temaba jenjang nung lir.

Arishi kum 33 tain Kvitova-i 2011 aser 2014 kum Wimbledon akok ajisiuaka lai tang tashi nung temaba jenjang khen danga tongteta mali aser la 2015 nungi 2019 tsüngda kanga junga asaya aliba mapang No 2 tashi tongteta asayaogo.

Miami nung tang mezüngbuba asayamung akokba sülen la tang 10buba nung lir.

Final asaya makokla Elena Rybakina, shibai Wimbledon tesüsabuba koker lir, lai March ita Indian Wells asayamung akokba sülen jenjang tenetbubai atu aser la Hombarnü sayaba rankings nunga kasa jenjang nung dang lir.

Temaba jenjang nung alila Swiatek yiruba ajanga Miami nung masayatet ajisiuaka la tanabuba jenjang nung alila Aryna Sabalenka dang nungi point 2,000 dak tema agi timba lir aser tasembuba jenjang nung America tsür Jessica Pegula lir.

France tsür Caroline Garcia maneni pezübuba aser Tunisia tsür Ons Jabeur pongububa nung lir.

Miami nung quarter final tonga asayala Italy tsür

Martina Trevisan tang mezüngbuba top 20-i iogo. Maneni Romania tsü Sorana Cirstea, shibai Indian Wells nung quarter aser Miami nung semifinal tonga asayaogo, la jenjang 33 tejakdangi tua tang 41buba nung lir.

WTA RANKINGS

1. Iga Swiatek (POL) 8,975 pts
2. Aryna Sabalenka (BLR) 6,945
3. Jessica Pegula (USA) 5,605
4. Caroline Garcia (FRA) 4,990
5. Ons Jabeur (TUN) 4,866
6. Cori Gauff (USA) 4,346
7. Elena Rybakina (KAZ) 4,305
8. Daria Kasatkina 3,375
9. Maria Sakkari (GRE) 3,191 (+1)
10. Petra Kvitova (CZE) 3,162 (+2)
11. Belinda Bencic (SUI) 3,035
12. Barbora Krejčíková (CZE) 2,443 (+1)
13. Veronika Kudermetova 2,360 (-2)
14. Beatriz Haddad Maia (BRA) 2,276
15. Liudmila Samsonova 2,246
16. Karolina Pliskova (CZE) 2,210 (+1)
17. Ekaterina Alexandrova 2,185 (+1)
18. Victoria Azarenka 2,182 (-2)
19. Magda Linette (POL) 1,855
20. Martina Trevisan (ITA) 1,778 (+4).

Malaysia nung tasüba... (Tapak 7 nungi...)

"Tasüba temerenshi agi temelenshi bener arutsü imlaba ama meliasü," ta Ramkarpal Singh-i ashi.

Iba temelenshi ya linük indang upper house nunga molunga agizüktsüla saka yangji tetsükdaktsü makai agizüktsü imlar.

Iba ozüng tasenba yagi tasüba temerenshi angutsü alirtem parnok temerenshi tanaben repringshimtsü mesüra ken o jembishitsü asoshi anogo 90 angutsü. Malaysia nung tasüba temerenshi angutsü ataa tepuokdak nisung 1,341 lir.

Malaysia nung mapa tamajung 34 inyakba atema tasüba agi merenshitsü mela lir

asir item rongnung Hombar masüadang aibelen 11 atema kechi südir süaka tasüba

temerenshi agiija liasü. Linük nung tasüba temerenshi agentsü asoshi legislative nung inyakyim ya taoba kum June ita tenzika liasü aser iba mapang Ato Kilonser Ismail Sabri Yaakob kübok taoba Malaysian sorkari tasüba temerenshi aginetsü sandonga liasü.

Item ozüng melenshitsü atema bill ana taoba hopta parliament nung benoka liasü.

Alima nung tasüba temerenshi amshiba linük 53 rongnung Malaysia ya ka lir. Region nung China aser Singapore nunga iba ozüng ya amshir.

Malaysia nung 1992 aser 2023 tsüngta tepuokdak alir nisung 1,318 shi alenseta südaktsüogo, ta ashir.

BILEMDANGANG

"Temelenshi aginüra melenshir alir den medemang."